



REPUBLIKA E SHQIPËRISË
Kuvendi

PROJEKT LIGJ

Nr. _____/2019

PËR

DISA NDRYSHIME DHE SHTESA NË LIGJIN NR.9920,
DATË 19.5.2008, “PËR PROCEDURAT TATIMORE NË REPUBLIKËN
E SHQIPËRISË”, TË NDRYSHUAR

Në mbështetje të neneve 78, 83, pika 1, dhe 155, të Kushtetutës, me propozimin e Këshillit të Ministrave, Kuvendi i Republikës së Shqipërisë

V E N D O S I:

Në ligjin nr.9920, datë 19.5.2008, “Për procedurat tatimore në Republikën e Shqipërisë”, të ndryshuar, bëhen ndryshimet dhe shtesat, si më poshtë vijon:

Neni 1

Në fjalinë e dytë, të pikës 1, të nenit 41, fjalët “... sipas shkronjës “b”, të pikës 1, të nenit 121, të këtij ligji ...” zëvendësohen me fjalët “... sipas pikës 2, të nenit 121, të këtij ligji ...”.

Neni 2

Në nenin 46 bëhen këto ndryshime:

1. Në pikën 1, fjalët “faturë tatimore, dëftesë tatimore ose kupon tatimor” zëvendësohen me fjalën “faturë”.
2. Pika 3 ndryshon, me këtë përmbajtje:

“3. Tatimpaguesi nuk është i detyruar të mbajë regjistra të veçantë, sipas pikës 2, të këtij neni, për të cilat administrata tatimore harton raporte automatike, në përputhje me ligjin për faturën dhe sistemin e monitorimit të qarkullimit.”.

Neni 3

Në nenin 47 bëhen këto ndryshime:

1. Fjalët “... faturë të thjeshtë tatimore apo kuponë tatimorë ...” zëvendësohen me fjalën “... faturë ...”.
2. Në fund të paragrafit shtohen fjalët “... dhe ligjit për faturën dhe sistemin e monitorimit të qarkullimit ...”.

Neni 4

Pika 3, e nenit 48, shfuqizohet.

Neni 5

Nenet 49, 50, 51, 52, 53, 54, 55 dhe 56 shfuqizohen.

Neni 6

Në pikën 4, të nenit 57, fjalët “... fatura të thjeshta tatimore, dëftesa tatimore dhe kuponë tatimorë ...” zëvendësohen me fjalën “... faturë ...”.

Neni 7

Në nenin 58 bëhen këto shtesa:

1. Pas fjalëve “... dokumentet e nevojshme tatimore ...” shtohen fjalët “... duke përfshirë faturën e shoqërimit, në përputhje me ligjin për faturën dhe sistemin e monitorimit të qarkullimit.
2. Pas paragrafit të parë shtohet paragrafi i dytë, me këtë përmbajtje:

“Tatimpaguesi, që mban në ruajtje, përdor apo transporton mallra të pashoqëruara me dokumente tatimore, dënohet, në përputhje me nenin 121, të këtij ligji.”.

Neni 8

Pika 2, e nenit 67, riformulohet, me këtë përmbajtje:

“2. Deklarata e ndryshuar prej tatimpaguesit mund të dorëzohet brenda 36 (tridhjetë e gjashtë) muajve vetëm një herë nga afati i dorëzimit të deklaratës fillestare, me kushtin që kjo deklaratë të mos jetë kontrolluar më parë nga administrata tatimore.

Përrjashtimisht përcaktimit të paragrafit të parë, të kësaj pike, një deklaratë e kontrolluar mund të ndryshohet nga tatimpaguesi në çdo rast kur ai ka për të deklaruar një detyrim tatimor më të madh se detyrimi që ka rezultuar nga kontrolli.

Për deklaratën tatimore “Listëpagesë e kontributeve të sigurimeve shoqërore, shëndetësore dhe tatim mbi të ardhurat personale nga punësimi”, tatimpaguesi ka të drejtë ta korrigjojë vetëm 1 (një) herë brenda muajit të parë pas deklarimit. Individidi tatimpagues ka të drejtë të korrigjojë “Deklaratën individuale vjetore të të ardhurave” për saktësim, deri në dy herë pa u penalizuar, brenda 3 (tre) muajve nga dorëzimi i deklaratës.”.

Neni 9

Shkronja “ë”, e nenit 71, ndryshohet, me këtë përmbajtje:

“ë) tatimpaguesi nuk lëshon faturë dhe/ose nuk kryen procedurat e fiskalizimit, në përputhje me ligjin për faturën dhe sistemin e monitorimit të qarkullimit.”.

Neni 10

Pas pikës 3, të nenit 75, shtohet pika 4, me këtë përmbajtje:

“4. Në raste të veçanta, shumat e tatimeve dhe të taksave për t’u paguar apo të paguara më tepër në administratën tatimore mund të kompensohen me tatime dhe taksa të paguara më tepër apo për t’u paguar në administratën doganore. Ministri përgjegjës për financat përcakton me udhëzim procedurat dhe kriteret për zbatimin e kësaj pike.”.

Neni 11

Pas pikës 1/1, të nenit 75/1, shtohet pika 1/2, me këtë përmbajtje:

“1/2. Në raste të veçanta, më kërkesë të administratës tatimore, marrëveshja për pagesë me këste mund të lidhet edhe për detyrime që administrata tatimore ka ndaj tatimpaguesve për kërkesa të miratuara për rimbursimin e TVSH-së, pasi më parë palët kanë rënë dakord për planin e pagesave me këste të këtij detyrimi. Në këto raste, detyrimi i administratës tatimore ndaj tatimpaguesit konsiderohet i shlyer dhe nuk aplikohen kamatëvonesat. Procedurat dhe kriteret për zbatimin e kësaj pike përcaktohen me vendim të Këshillit të Ministrave. Parashikimet e kësaj pike zbatohen deri më 30.6.2021.”.

Neni 12

Pika 7, e nenit 77, ndryshohet, me këtë përmbajtje:

“7. Marrëveshja për pagesë me këste mund të lidhet për detyrime tatimore të vendosura nga administrata tatimore si rezultat i një vlerësimi tatimor të kryer, sipas nenit 68, të këtij ligji, si dhe për detyrime tatimore të vetëdeklaruar nga tatimpaguesi.

Pavarësisht sa më sipër, administrata tatimore nuk hyn në një marrëveshje të pagesës me këste, për detyrim tatimor mbi të ardhurat, të mbajtur në burim dhe të vetëdeklaruar nga tatimpaguesi, si dhe për detyrim nga kontributet e sigurimeve shoqërore e shëndetësore, i cili është llogaritur ose mbledhur, ose mbajtur prej tatimpaguesit.

Përfundimisht, në rastet kur në cilësinë e tatimpaguesit janë institucione apo ente shtetërore apo publike, qendrore apo vendore, apo ente të tjera ku shteti është palë, për raste të një interesi të lartë publik ose të nevojës për moslejimin e cenimit të rendit e të sigurisë kombëtare, mund të lidhet një marrëveshje me këste edhe për detyrimet e kontributeve të sigurimeve shoqërore e shëndetësore.

Marrëveshja me këste nuk lehtëson pozitën ligjore të personit përgjegjës në rastet e prezumimit apo të konsumimit të veprës penale të parashikuar ligjërisht lidhur me detyrimin tatimor të vetëdeklaruar nga tatimpaguesi, i cili është llogaritur ose mbledhur, ose mbajtur prej tij, përfshirë kontributet e sigurimeve shoqërore e shëndetësore.”.

Neni 13

Në nenin 80 bëhen këto ndryshime:

Pas pikës 1 shtohet pika 1/1, me këtë përmbajtje:

“1/1. Administrata tatimore kryen mbikëqyrjen e dispozitave të lëshimit të faturave dhe të monitorimit të qarkullimit (në vijim, kontrolli i lëshimit të faturave), në përputhje me ligjin që rregullon faturën e sistemin e monitorimit të qarkullimit dhe të ligjit për tatimin mbi vlerën e shtuar.”.

Neni 14

Në nenin 81 bëhen këto ndryshime:

1. Në rreshtin e parë, të pikës 1/1, dhe në pikën 3, numri “30” bëhet “10”.
2. Në rreshtin e parafundit, të pikës 1/1, numri “10” bëhet “5”.
3. Pas pikës 6 shtohen pikat 7, 8, 9 dhe 10, me këtë përmbajtje:
 - “7. Njoftimi i kontrollit tatimor i lëshimit të faturave i dërgohet tatimpaguesit të njëjtën ditë kur fillon kontrolli tatimor në vendndodhjen e biznesit të tatimpaguesit.
 8. Njoftimi sipas pikës 7, të këtij neni, përveç të dhënave të përcaktuara në shkronjat “a”, “b”, “c” dhe “ç”, të pikës 2, të këtij neni, përmban edhe të dhënat e mëposhtme:
 - a) përshkrimin e të drejtave dhe të detyrimeve të tatimpaguesit gjatë dhe pas përfundimit të kontrollit tatimor;
 - b) nënshkrimin e personit përgjegjës.
 9. Me përjashtim të pikave 7 e 8, të këtij neni, njoftimi i kontrollit tatimor i lëshimit të faturave nuk është i nevojshëm t’i dërgohet tatimpaguesit përpara fillimit të kontrollit tatimor, nëse:
 - a) zyrtari i administratës tatimore, gjatë kohës së kryerjes së detyrave zyrtare të tij, konstaton drejtpërdrejt kryerjen e një vepre penale tatimore, pavarësisht nëse detyra zyrtare e tij është kryer te tatimpaguesi apo shkelësi;
 - b) kontrolli tatimor fillon pas marrjes së informacionit nga strukturat përkatëse, përgjegjëse për pranimin e denoncimeve dhe informacionit mbi shkeljet e kryera, dhe, në këtë rast, njoftimi paraprak i tatimpaguesit do të rrezikonte qëllimin e kontrollit tatimor. Kontrolli tatimor duhet të fillojë menjëherë.

10. Në rastin sipas përcaktimit të pikës 9, të këtij neni, njoftimi i kontrollit tatimor i dërgohet tatimpaguesit në të njëjtën kohë me raportin e kontrollit tatimor, sipas nenit 83, të këtij ligji.”.

Neni 15

Pas pikës 6, të nenit 83, shtohen pikat 7, 8, 9 e 10, me këtë përmbajtje:

- “7. Në rastin e kontroleve për lëshimin e faturave, raporti i kontrollit tatimor përmban rezultatet e kontrollit tatimor dhe listën e shkeljeve të konstatuara, përfshirë edhe përshkrimin e dispozitave ligjore, të cilat janë shkelur. Raporti i kontrollit tatimor i lëshimit të faturave nënshkruhet nga inspektori/inspektorët, i cili/të cilët kanë marrë pjesë në kontrollin tatimor.
8. Raportin e kontrollit tatimor të lëshimit të faturave, sipas pikës 7, të këtij neni, e miraton struktura përkatëse e ngarkuar me atë detyrë.
9. Pas marrjes së kundërshtimit ndaj raportit të kontrollit tatimor, kryhet një raport plotësues, i cili nënshkruhet nga personi që mbikëqyr inspektorët, të cilët kanë kryer kontrollin tatimor, ndërsa miratohet nga personi përgjegjës i Drejtorisë Rajonale të Tatimeve, duke përfshirë përgjegjësin e sektorit, drejtorin e drejtorisë përkatëse dhe drejtorin e Drejtorisë Rajonale të Tatimeve.
10. Nëse në raportin e kontrollit tatimor konstatohen shkelje, zbatohen dënimet administrative të parashikuara në legjislacionin tatimor.”.

Neni 16

Në pikën 1, të nenit 90, pas fjalëve “... i kërkon çdo banke ...” shtohen fjalët “... sipas përcaktimeve në udhëzimin e ministrit të Financave ...”.

Neni 17

Në pikën 1, të nenit 91, pas fjalëve “... sigurohet në favor të administratës tatimore mbi të gjithë pasurinë e tatimpaguesit ...” shtohen fjalët “... në përputhje me rregullat e detajuara me udhëzim të ministrit të Financave”.

Neni 18

Në nenin 96 bëhen këto ndryshime:

1. Titulli i nenit riformulohet: “Shitja e pasurisë së konfiskuar”.

2. Pas pikës 3 shtohet pika 4, me këtë përmbajtje:

“4. Ministria e Drejtësisë dhe Ministria e Financave dhe Ekonomisë, me udhëzim të përbashkët, përcaktojnë procedurat që do të zbatohen për pasuritë e konfiskuara sipas aktit administrativ të konfiskimit.”.

Neni 19

Pika 6, e nenit 103, ndryshohet, me këtë përmbajtje:

“6. Deklarimi i pambledhshëm i detyrimit tatimor apo i një pjese të tij bëhet, si më poshtë vijon:

- a) Për shuma deri në 1 000 000 (një milion) lekë bëhet me urdhër të drejtorit Rajonal të Tatimeve, bazuar në vendimin e marrë nga komisioni i ngritur për këtë qëllim në DRT, i cili funksionon sipas përcaktimeve të bëra në udhëzimin e ministrit përgjegjës për financat, në zbatim të këtij ligji.
- b) Për shuma mbi 1 000 000 (një milion) lekë deri në 5 000 000 (pesë milionë) lekë, sipas propozimit të DRT-së, bëhet me urdhër të drejtorit të Përgjithshëm të Tatimeve, bazuar në vendimin e marrë nga komisioni i ngritur për këtë qëllim në DPT. Komisioni funksionon sipas përcaktimeve të bëra në udhëzimin e ministrit përgjegjës për financat, në zbatim të këtij ligji.
- c) Për shuma mbi 5 000 000 (pesë milionë) lekë, sipas propozimit të DPT-së, bazuar në vendimin e marrë nga komisioni i ngritur për këtë qëllim në DPT, bëhet me urdhër të ministrit përgjegjës për financat. Komisioni funksionon sipas përcaktimeve të bëra në udhëzimin e ministrit përgjegjës për financat, në zbatim të këtij ligji.”.

Neni 20

Fjalja e dytë, e shkronjës “b”, të pikës 1, të nenit 119, del paragraf më vete dhe ndryshohet, me këtë përmbajtje:

“Këto gjopa nuk aplikohen në rastin kur nga verifikimi dhe kontrolli në vendndodhjen e aktivitetit të tatimpaguesit me status ligjor - person fizik, i deklaruar si “i vetëpunësuar me punonjës të papaguar të familjes”, evidentohen persona mbi 16 (gjashtëmbëdhjetë) vjeç, të cilët kategorizohen si punonjës të papaguar të familjes. Pas konstatimit, organi tatimor duhet të vërtetojë në portalin “e-Albania”, nëpërmjet certifikatës

familjare të të vetëpunësuarit, se personi i evidentuar në vendin e aktivitetit është person i papaguar i familjes, që bashkëjeton ligjërisht me të vetëpunësuarin, sipas kuptimit të Kodit Civil.”.

Neni 21

Neni 121 riformulohet, me këtë përmbajtje:

“Neni 121

Mallrat e pashoqëruara me dokumente tatimore

1. Për tatimpaguesit, që mbajnë në ruajtje, përdorin ose transportojnë mallra të pashoqëruara me dokumente tatimore, në përputhje me dispozitat e këtij ligji dhe të ligjit që rregullon faturën dhe sistemin e monitorimit të qarkullimit, aplikohen dënimet, si më poshtë vijon:
 - a) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël, të cilët nuk janë të regjistruar për TVSH-në, dhe tatimpagues të tjerë dënohen me gjobë prej 50 000 (pesëdhjetë mijë) lekësh;
 - b) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël dhe për TVSH-në dënohen me gjobë prej 100 000 (njëqind mijë) lekësh;
 - c) Tatimpaguesit e regjistruar me përgjegjësinë tatimore të tatimit mbi fitimin dhe për TVSH-në dënohen me gjobë prej 150 000 (njëqind e pesëdhjetë mijë) lekësh.
2. Personi, i cili nuk është i regjistruar në regjistrin përkatës, në përputhje me dispozitat e nenit 41, të këtij ligji, dhe që, në rastin e konstatimit të shkeljes, ruan, përdor ose transporton mallra për qëllime të ushtrimit të veprimtarisë ekonomike, dënohet me gjobë prej 100 000 (njëqind mijë) lekësh.
3. Në përputhje me nenin 116, të këtij ligji, administrata tatimore ushtron të drejtën e parashikuar në nenin 131, të këtij ligji, duke e kallëzuar penalisht tatimpaguesin.
4. Ruajtja, përdorimi ose transportimi i mallrave, me qëllim të ushtrimit të veprimtarisë ekonomike, sipas kuptimit të pikës 1, të këtij neni, konsiderohet ajo sasi e mallrave, pavarësisht nga lloji, origjina dhe prishja, që nuk i shërben as nevojave të personit të kapur me mallra, as anëtarëve të familjes së tij.”.

Neni 22

Neni 122 ndryshohet në titull dhe në përmbajtje, si më poshtë vijon:

“Neni 122

Shkeljet për mosregjistrimin e të dhënave të subjekteve që lëshojnë fatura

1. Personi, i cili është subjekt i lëshimit të faturës ose i faturës shoqëruese, në përputhje me ligjin që rregullon faturën dhe sistemin e monitorimit të qarkullimit, dënohet me gjobë, si më poshtë vijon:
 - a) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël, të cilët nuk janë të regjistruar për TVSH-në, dhe tatimpagues të tjerë dënohen me gjobë prej 50 000 (pesëdhjetë mijë) lekësh;
 - b) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël dhe për TVSH-në dënohen me gjobë prej 100 000 (njëqind mijë) lekësh;
 - c) Tatimpaguesit e regjistruar me përgjegjësinë tatimore të tatimit mbi fitimin dhe për TVSH-në dënohen me gjobë prej 150 000 (njëqind e pesëdhjetë mijë) lekësh.
2. Gjobat, sipas shkronjave “a”, “b”, “c”, të pikës 1, aplikohen nëse:
 - a) brenda 24 (njëzet e katër) orëve përpara lëshimit të faturës së parë, nuk njofton administratën tatimore për fillimin e kryerjes së furnizimit me mallra e shërbime, mbi bazën e së cilës është i detyruar të lëshojë fatura në përputhje me këtë ligj, përveç nëse është person i regjistruar në regjistrin e administratës tatimore si tatimpagues i TVSH-së, tatimpagues i tatimit mbi fitimin ose tatimpagues i tatimit të thjeshtuar mbi fitimin për biznesin e vogël;
 - b) brenda 24 (njëzet e katër) orëve përpara lëshimit të faturës së parë, nuk dorëzon në administratën tatimore të dhënat për vendndodhjen e biznesit që përdor për ushtrimin e veprimtarisë ekonomike;
 - c) nuk i dorëzon të dhënat për çdo operator, person fizik i autorizuar për të lëshuar faturat, brenda 24 (njëzet e katër) orëve përpara fillimit të lëshimit të faturës nga secili operator;
 - ç) nuk dorëzon informacionin për mirëmbajtësin e *software-it* brenda 24 (njëzet e katër) orëve nga lidhja e kontratës për këtë shërbim;

- d) nuk dorëzon të dhënat në administratën tatimore për ndryshimin e të dhënave sipas shkronjave “b”, “c” dhe “ç”, të kësaj pike, brenda afateve kohore të përcaktuara.”.

Neni 23

Neni 123 ndryshon në titull dhe në përmbajtje, si më poshtë vijon:

“Neni 123

Shkeljet për moslëshimin e faturave dhe të faturave shoqëruese

1. Personi, i cili është subjekt i lëshimit të faturës ose i faturës shoqëruese, në përputhje me ligjin për faturën dhe sistemin e monitorimit të qarkullimit dhe ligjin për TVSH-në, kryen shkelje, nëse:
 - a) nuk lëshon faturë për çdo furnizim të mallrave ose të shërbimeve në Republikën e Shqipërisë;
 - b) nuk lëshon faturë për çdo pagesë të bërë përpara furnizimit të mallit ose përpara përfundimit të shërbimit (për parapagimin);
 - c) nuk lëshon faturë për çdo pranim të mallrave ose të ofrimit të shërbimit, nëse është subjekt i “vetëfaturimit”;
 - ç) nuk lëshon faturë në kohën e furnizimit të mallrave ose shërbimeve ose, më së voni, brenda afateve kohore të parashikuara që përbëjnë përjashtim të këtij rregulli;
 - d) lëshon faturë që nuk përmban të gjitha elementet e përcaktuara të faturës;
 - dh) faturën që lëshon për pagesat me para në dorë dhe, në raste të veçanta, faturën për pagesat pa para në dorë, nuk e shtyp në letër e nuk zbaton procedurën e fiskalizimit, si dhe nuk i dorëzon faturën blerësit në kohën e furnizimit;
 - e) shuma e parave në dorë të arkëtuara mbi maksimumin e arkës ose nëse shuma totale, në rastet e përcaktuara, nuk depozitohet në një llogari të hapur në bankë, jo më vonë se fundi i ditës së ardhshme të punës;
 - ë) nuk lëshon faturë shoqëruese për çdo lëvizje të mallrave nga një vend në tjetrin pa tjetërsim të pronësisë ndaj mallrave.

Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël, të cilët nuk janë të regjistruar për TVSH-në, dhe tatimpagues të tjerë dënohen me gjobë prej 50 000 (pesëdhjetë mijë) lekësh.

Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël dhe për TVSH-në, dënohen me gjobë prej 100 000 (njëqind mijë) lekësh, por jo më pak se vlera e TVSH-së së munguar.

Tatimpaguesit e regjistruar me përgjegjësinë tatimore të tatimit mbi fitimin dhe për TVSH-në dënohen me gjobë prej 150 000 (njëqind e pesëdhjetë mijë) lekësh, por jo më pak se vlera e TVSH-së së munguar.

2. Për tatimpaguesit, të cilët kryejnë shkeljet, sipas shkronjave “a”, “b” dhe “c”, të pikës 1, të këtij neni, përveç masës së gjobës, siç përcaktohet në pikën 1, për tatimpaguesit e regjistruar për TVSH-në bëhet vlerësim tatimor për tre muajt e fundit, duke përdorur metodat alternative, të parashikuara në nenet 71 e 72, të këtij ligji.
3. Për tatimpaguesin, i cili, për herë të dytë brenda vitit kalendarik, kryen një shkelje sipas shkronjave “a”, “b” dhe “c”, të pikës 1, të këtij neni, merren edhe masat e mëposhtme:
 - a) gjobë prej 100 000 (njëqind mijë) lekësh për tatimpaguesit e tatimit të thjeshtuar mbi fitimin e biznesit të vogël pa TVSH-në; 200 000 (dyqind mijë) lekë, për tatimpaguesit e tatimit të thjeshtuar mbi fitimin e biznesit të vogël me TVSH-në; 300 000 (treqind mijë) lekë, për tatimpaguesit e tjerë të regjistruar për tatim fitimi dhe TVSH-në;
 - b) për tatimpaguesit e regjistruar për TVSH-në bëhet vlerësim tatimor për periudhat e fundit të pavarësuar, por jo më tepër se tre muajt, duke përdorur metodat alternative, të parashikuara në nenet 71 e 72, të këtij ligji;
 - c) merret masa e bllokimit të veprimtarisë në vendin ku është konstatuar shkelja për 30 (tridhjetë) ditë kalendarike.

Masa e bllokimit, sipas shkronjës “c”, të kësaj pike, hiqet, nëse tatimpaguesi paguan penalitetet e vendosura.

4. Tatimpaguesi, i cili, për herë të tretë e në vijim brenda vitit kalendarik, kryen shkeljet e përcaktuara në shkronjat “a”, “b” dhe “c”, të pikës 1, të këtij neni, përveç dënimit sipas pikës 3, të këtij neni, procedohet për ndjekje penale, sipas pikës 2, të nenit 116, të këtij ligji. Gjithashtu, publikohen emri i tatimpaguesit, NIPT-i dhe emri i përfaqësuesit të biznesit në faqen zyrtare të internetit të Drejtorisë së Përgjithshme të Tatimeve.

5. Për tatimpaguesin, ndaj të cilit, pas rikontrollit tatimor të kryer brenda 15 (pesëmbëdhjetë) ditëve nga konstatimi i parë i shkeljeve, sipas shkronjës “e”, të pikës 1, të këtij neni, përsëri konstatohet shkelje e njëjtë, zbatohen dënimet e përcaktuara në shkronjën “a”, të pikës 3, të këtij neni.
6. Tatimpaguesi, i cili lëshon një dëftesë tatimore/biletë me vlerë të parashtypur, që nuk përmban elementet e përcaktuara në këtë ligj dhe në aktet nënligjore, për dëftesën tatimore/biletën me vlerë të parashtypur dënohet me gjobë në masën 50 000 (pesëdhjetë mijë) lekë.
7. Tatimpaguesi, i cili lëshon dëftesë tatimore, ku ka shënuar një vlerë të ndryshme nga vlera e furnizimit ose e çmimit të afishuar, dënohet me gjobë në masën 50 000 (pesëdhjetë mijë) lekë.
8. Moslëshimi i biletave të shërbimit me vlerë të parashtypur, të prodhuara nga institucionet e autorizuar, të përdorura në sektorë të ndryshëm, dënohet me gjobë në masën 10 000 (dhjetë mijë) lekë për çdo biletë.”.

Neni 24

Neni 124 ndryshohet në titull dhe në përmbajtje, si më poshtë vijon:

“Neni 124

Shkeljet në procedurën e fiskalizimit të faturave dhe sistemin
e monitorimit të qarkullimit

1. Tatimpaguesi, i cili është subjekt i lëshimit të faturës ose i faturës shoqëruese, në përputhje me ligjin që rregullon faturën dhe sistemin e monitorimit të qarkullimit, dënohet me gjobë, si më poshtë vijon:
 - a) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël, të cilët nuk janë të regjistruar për TVSH-në, dhe tatimpagues të tjerë dënohen me gjobë prej 50 000 (pesëdhjetë mijë) lekësh;
 - b) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël dhe për TVSH-në dënohen me gjobë prej 100 000 (njëqind mijë) lekësh;
 - c) Tatimpaguesit e regjistruar me përgjegjësinë tatimore të tatimit mbi fitimin, në përputhje me ligjin për tatimin mbi të ardhurat dhe për TVSH-në, dënohen me gjobë prej 150 000 (njëqind e pesëdhjetë mijë) lekësh.
2. Gjobat, sipas shkronjave “a”, “b” dhe “c”, të pikës 1, aplikohen nëse:

- a) nuk instalojnë pajisjen elektronike të faturimit ose nuk pajisen me pajisje elektronike të faturimit të lëvizshëm dhe me printer fiskal, i cili përmban një *software* për nënshkrimin elektronik të faturës dhe nuk sigurojnë një lidhje interneti për shkëmbimin elektronik të të dhënave me administratën tatimore, në rast të pagesave me para në dorë;
- b) nuk instalojnë pajisjen elektronike ose nuk pajisen me pajisje elektronike të lëvizshme dhe një printer, i cili përmban një *software* për nënshkrimin elektronik të faturës shoqëruese dhe nuk sigurojnë një lidhje interneti për shkëmbimin elektronik të të dhënave me administratën tatimore;
- c) nuk pajisen nga AKSHI me certifikatën digjitale të përcaktuar për nënshkrimin elektronik të faturës ose të faturës shoqëruese dhe për identifikimin e tatimpaguesit që lëshon fatura;
- ç) nuk lëshojnë faturat nëpërmjet pajisjeve elektronike të faturimit të përcaktuar në shkronjën “a”, të kësaj pike, ose nëpërmjet përdorimit të një *software*-i të përcaktuar për lëshimin e faturave pa para në dorë;
- d) nuk zbatojnë procedurën e fiskalizimit për shitje nëpërmjet pajisjeve të vetëshërbimit;
- dh) nuk përdorin *software* që mundësojnë shmangien nga zbatimi i fiskalizimit të lëshimit të faturave ose zbatimit të fiskalizimit të shitjes nëpërmjet pajisjeve të vetëshërbimit;
- e) në rast të ndërprerjes së internetit, nuk krijojnë lidhje elektronike brenda 48 (dyzet e tetë) orëve nga data kur lidhja është ndërprerë dhe nuk i dorëzojnë të gjitha faturat e lëshuara pa të dhënat e numrit identifikues të veçantë të faturës (NIVF-së) tek administrata tatimore, ose në atë afat nuk njoftojnë administratën tatimore për pamundësinë e krijimit të një lidhjeje elektronike (internet);
- ë) në rast të ndërprerjes së plotë të punës së pajisjes fiskale, nuk lëshojnë dëftesat e vërtetuara nga administrata tatimore dhe, në afatin e përcaktuar, nuk rivendosin punën e pajisjeve fiskale për lëshimin e faturave ose nuk pajisen brenda afatit të caktuar me pajisje të re, nuk dorëzojnë të gjitha faturat e lëshuara në administratën tatimore, gjatë kohës së ndërprerjes së punës së pajisjes fiskale;
- f) ushtrojnë veprimtari ekonomike në vendndodhjen e biznesit, ku nuk është e mundur të vendoset një lidhje elektronike (internet) dhe për këtë ka një vërtetim të AKEP-it, të cilin nuk e dorëzojnë në administratën tatimore dhe nuk dorëzojnë

- të dhënat për faturat e lëshuara brenda afatit të përcaktuar e në mënyrën e përcaktuar;
- g) nuk afishojnë një njoftim në secilën pajisje elektronike të faturimit ose në një vend tjetër të dukshëm në vendndodhjen e biznesit, që tregon detyrimin për të lëshuar faturën, si dhe detyrimin e blerësit për të marrë dhe ruajtur faturën.”.

Neni 25

Pas nenit 124 shtohen nenet 124/1 dhe 124/2, me këtë përmbajtje:

“Neni 124/1

Mosregjistrimi i prodhuesit dhe i mirëmbajtësit të *software-it* për lëshimin e faturave

1. Prodhuesi dhe/ose mirëmbajtësi i *software-it*, i cili nuk është regjistruar në regjistrin e prodhuesve ose të mirëmbajtësit të *software-it*, përpara fillimit të ofrimit ose të mirëmbajtjes së *software-it* për lëshimin e faturave ose të faturave shoqëruese, në administratën tatimore, në përputhje me ligjin që rregullon faturën e sistemin e monitorimit të qarkullimit, dënohet me gjobë 1 000 000 (një milion) lekë për këtë shkelje.
2. Prodhuesi dhe/ose mirëmbajtësi i *software-it*, programi i të cilit përdoret nga subjekti që lëshon fatura, nuk mundëson procedurën e fiskalizimit dhe nëse *software* përmban mundësi, të cilat shmangin procedurën e fiskalizimit të faturës së lëshuar, në përputhje me ligjin që rregullon faturën dhe sistemin e monitorimit të qarkullimit, dënohet me gjobë 1 000 000 (një milion) lekë për këtë shkelje.

Neni 124/2

Shkeljet në procedurën e lëshimit dërgimit dhe pranimit të *e-Faturës*

1. Personi, i cili është subjekt i lëshimit të *e-Faturës*, në përputhje me ligjin që rregullon faturën dhe sistemin e monitorimit të qarkullimit, dënohet me gjobë, si më poshtë vijon:
 - a) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël, të cilët nuk janë të regjistruar për TVSH-në, dhe tatimpagues të tjerë dënohen me gjobë prej 50 000 (pesëdhjetë mijë) lekësh.
 - b) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël dhe për TVSH-në

dënohen me gjobë prej 100 000 (njëqind mijë) lekësh, por jo më pak se vlera e TVSH-së së munguar.

- c) Tatimpaguesit e regjistruar me përgjegjësinë tatimore të tatimit mbi fitimin, në përputhje me ligjin për tatimin mbi të ardhurat dhe për TVSH-në, dënohen me gjobë prej 150 000 (njëqind e pesëdhjetë mijë) lekësh, por jo më pak se vlera e TVSH-së së munguar.

2. Gjjobat, sipas shkronjave “a”, “b” dhe “c”, të pikës 1, aplikohen nëse:

- a) nuk lëshojnë apo dërgojnë *e-Faturën* dhe dokumentet shoqëruese, në përputhje me ligjin që rregullon faturën dhe sistemin e monitorimit të qarkullimit;
- b) lëshojnë dhe dërgojnë *e-Faturat* dhe dokumentet shoqëruese që nuk janë në përputhje me rregullat e përdorimit të *e-Faturës*;
- c) nuk janë regjistruar në regjistrin qendror të shkëmbimit të *e-Faturave*.

3. Personat, të cilët janë të detyruar të pranojnë *e-Faturën*, në përputhje me ligjin që rregullon faturën dhe sistemin e monitorimit të qarkullimit, dënohen me gjobë, si më poshtë vijon:

- a) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël, të cilët nuk janë të regjistruar për TVSH-në, dhe tatimpagues të tjerë dënohen me gjobë prej 50 000 (pesëdhjetë mijë) lekësh;
- b) Tatimpaguesit e regjistruar me përgjegjësinë tatimore të tatimit të thjeshtuar mbi fitimin për biznesin e vogël dhe për TVSH-në dënohen me gjobë prej 100 000 (njëqind mijë) lekësh;
- c) Tatimpaguesit e regjistruar me përgjegjësinë tatimore të tatimit mbi fitimin dhe për TVSH-në dënohen me gjobë prej 150 000 (njëqind e pesëdhjetë mijë) lekësh, por jo më pak se vlera e TVSH-së së munguar.

4. Gjjobat, sipas shkronjave “a”, “b” dhe “c”, të pikës 3, aplikohen nëse:

- a) pranojnë dhe përpunojnë *e-Fatura* dhe dokumentet shoqëruese që nuk janë në përputhje me rregullat e përdorimit të *e-Faturës*;
- b) nuk pranojnë ose nuk përpunojnë *e-Faturat* dhe dokumentet shoqëruese, në përputhje me ligjin që rregullon faturën dhe sistemin e monitorimit të qarkullimit;

- c) kryejnë pagesat e *e-Faturës*, në kundërshtim me dispozitat e ligjit që rregullon faturën dhe sistemin e monitorimit të qarkullimit.
5. Personi, i cili është ndërmjetës i teknologjisë së informacionit që ofron shërbime për lëshim/dërgim të *e-Faturës*, të cilat nuk janë në përputhje me ligjin që rregullon faturën dhe sistemin e monitorimit të qarkullimit ose ofron shërbime për lëshim/dërgim të *e-Faturës* dhe të dokumenteve tjera shoqëruese, të cilat nuk janë në përputhje me rregullat e përdorimit të *e-Faturës* sipas ligjit, dënohet me gjobë 50 000 (pesëdhjetë mijë) lekë për çdo faturë.”.

Neni 26

Neni 125 ndryshohet në titull dhe në përmbajtje, si më poshtë vijon:

“Neni 125 Mosmarrja e faturës

Blerësi ose çdo pranues i faturës së lëshuar për pagesë me para në dorë, i cili nuk e merr faturën e lëshuar, dhe, me kërkesë të personit të autorizuar të administratës tatimore, nuk i tregon faturën e marrë pas largimit nga vendndodhja e biznesit të shitësit, dënohet me:

- a) 100 000 (njëqind mijë) lekë, nëse është tatimpagues i regjistruar për TVSH-në dhe/ose tatimin mbi fitimin;
- b) 50 000 (pesëdhjetë mijë) lekë, nëse është tatimpagues i regjistruar për tatimin e thjeshtuar mbi fitimin;
- c) 2 000 (dy mijë) lekë, nëse është individ, konsumator final.”.

Neni 27

Në nenin 128/1 bëhen këto ndryshime:

1. Në shkronjën “a”, fjalët “... sipas kërkesave të parashikuara në ligjin për TVSH-në ...” zëvendësohen me fjalët “... në përputhje me ligjin që rregullon faturën dhe sistemin e monitorimit të qarkullimit ...”.
2. Shkronjat “c” dhe “ç” shfuqizohen.

Neni 28

Pas shkronjës “ç”, të nenit 129, shtohet shkronja “d”, me këtë përmbajtje:

“d) 100 000 (njëqind mijë) lekë për çdo rast, nëse banka apo institucioni financiar që ofron shërbime të pagesave pa para në dorë të *e-Faturave* të lëshuara nga subjekti, i cili ka zbatuar procedurën e fiskalizimit, nuk e regjistron pagesën e kryer, si dhe për këtë pagesë nuk e njofton administratën tatimore nëpërmjet sistemit elektronik, menjëherë pas pagesës, në përputhje me ligjin që rregullon faturën dhe sistemin e monitorimit të qarkullimit.”.

Neni 29 **Shfuqizime**

Nga data e fillimit të zbatimit të këtij ligji, shfuqizohen udhëzimi nr.16, datë 3.5.2010, i ministrit të Financave, “Për administrimin dhe dokumentimin e procedurave të pajisjeve fiskale”, vendimi nr.781, datë 14.11.2007, i Këshillit të Ministrave, “Për karakteristikat teknike e funksionale të pajisjeve fiskale, sistemit të integruar të kompjuterizuar për transferimet periodike, automatike, të deklarimeve financiare, sistemit të komunikimit, për procedurën e dokumentacionin për miratimin e tyre dhe për kriteret për pajisjen, me autorizim, të shoqërive të autorizuar për ofrimin e pajisjeve fiskale”, i ndryshuar, dhe dispozitat e tjera të ligjeve zbatuese të nxjerra në zbatim të këtij ligji, të cilat janë në kundërshtim me këtë ligj.

Neni 30 **Hyrja në fuqi**

Ky ligj hyn në fuqi 15 ditë pas botimit në “Fletoren zyrtare” dhe fillon të zbatohet përkatësisht sipas afateve të përcaktuara në ligjin për faturën dhe sistemin e monitorimit të qarkullimit, me përjashtim të neneve 8, 10, 11, 12, 14, pikat 1 dhe 2, dhe të neneve 16, 17, 18, 19 e 20, të këtij ligji, të cilat fillojnë të zbatohen nga data 1.1.2020.

Në periudhën nga data e hyrjes në fuqi të këtij ligji deri në fillimin e zbatimit të tij, sipas afateve të përcaktuara në ligjin për faturën dhe sistemin e monitorimit të qarkullimit, përcaktimet për përdorimin e faturave e dënimet përkatëse zbatohen sipas përcaktimeve përpara hyrjes në fuqi të këtij ligji.

K R Y E T A R I

GRAMOZ RUÇI